



BARAZA LA WAWAKILISHI – ZANZIBAR

ORODHA YA SHUGHULI ZA LEO

BARAZA LA TISA LA WAWAKILISHI

MKUTANO WA NANE

Kikao cha Tano – Tarehe 13 Disemba, 2017.

Kikao Kitaanza Saa 3.00 (Tatu) Asubuhi
na Dua itasomwa.

I. MASWALI:

Ofisi ya Rais, Tawala za Mikoa, Serikali za Mitaa na Idara Maalum za SMZ:

100. MHESHIMIWA SULEIMAN SARAHAN SAID (Jimbo la Chake Chake) - Atamuuliza Mheshimiwa Waziri wa Nchi, Ofisi ya Rais, Tawala za Mikoa, Serikali za Mitaa na Idara Maalum za SMZ:

Serikali ya Mapinduzi ya Zanzibar inastahili pongezi kwa kuendeleza miji. Katika mji wa Chake Chake ipo barabara iliyobuniwa ya kutoka Gombani Muembe Karata kwenda Pondeani lakini barabara hiyo mpaka sasa bado haijakamilika kwa sababu ya kuwepo kwa kiwanja cha mtu katika eneo la kutokea upande wa Pondeani.

- (a) Je, sababu hiyo ya kutomalizika kwa barabara hiyo ni kweli.
- (b) Je, Serikali inachukua hatua gani za dharura kuimaliza barabara hiyo ili kupunguza msongamano wa magari yanayokwenda Wete kutoka Wesha au yanayotoka Wesha kwenda Wete bila kupitia katikati ya mji wa Chake Chake.
- (c) Je, ni lini barabara hiyo itakamilika kwa matumizi rasmi.

102. MHESHIMIWA SULEIMAN SARAHAN SAID (Jimbo la Chake Chake) - Atamuuliza Mheshimiwa Waziri wa Nchi, Ofisi ya Rais, Tawala za Mikoa, Serikali za Mitaa na Idara Maalum za SMZ:

Naipongeza Serikali ya Mapinduzi ya Zanzibar katika kuboresha miji yake. Lakini mji wa Chake Chake kwa sasa umekuwa na wafanyabiashara ndogo ndogo maarufu wamachinga, na kwa sasa hata barabara zote za mji zimekuwa hazipitiki na ni hatari kwa usalama wa wafanyabiashara hao na magari.

- (a) Je, Serikali ina mpango gani wa kuwatafutia eneo rasmi wafanyabiashara hao katika mji wa Chake Chake.
- (b) Je, Serikali ina mpango gani hivi sasa kuwaweka wafanyabiashara hao katika mazingira salama kuliko kuwaachia kuzagaa kila mmoja sehemu yake na kuleta msongomano katika mji.

Wizara ya Fedha na Mipango:

17. MHESHIMIWA MUSSA FOUM MUSSA (Jimbo la Kiwani) - Atamuuliza Mheshimiwa Waziri wa Fedha na Mipango.

Benki ya Watu wa Zanzibar (PBZ) ilitarajiwa kutumia jumla ya Tsh. 46.06 bilioni kwa ajili ya kufungua tawi katika Mkoa wa Dodoma, kuongeza vituo vya huduma katika maeneo ya Kigamboni na Tandika jijini Dar-es-Salaam, kuweka mashine za kutolea fedha (ATM) katika maeneo ya Kivunge, JKU Saateni, Paje, Chwaka na Mahakamani – Vuga kwa upande wa Unguja na kwa upande wa Pemba mashine zinatarajiwa kuwekwa katika eneo la Micheweni, Machomanne na Konde.

- (a) Je, Mhe. Waziri kazi hiyo imeshaanza.
- (b) Ni sehemu zipi zimeshakamilika uwekwaji wa huduma hizo.

18. MHESHIMIWA MUSSA FOUM MUSSA (Jimbo la Kiwani) - Atamuuliza Mheshimiwa Waziri wa Fedha na Mipango.

Katika Bajeti ya mwaka 2017/2018, Mfuko wa Hifadhi ya Jamii (ZSSF) ulipanga kukusanya jumla ya Tsh. 93.6 bilioni, kati ya hizo Tsh. 52.04 bilioni kutoka kwa wanachama wa Serikalini, Mashirika ya Umma, Taasisi binafsi na waliojajiri wenyewe, Tsh. 4.99 bilioni zitakusanywa kutokana na uwekezaji wa majengo na Tsh. 36.57 bilioni zitakusanywa kutokana na uwekezaji wa masoko ya fedha na mitaji ya muda mrefu na mfupi.

- (a) Je, mpaka muda huu ZSSF imeshakusanya kiasi gani
- (b) Je, kwa sehemu zote tatu zimefikiwa nusu ya lengo.

Wizara ya Elimu Na Mafunzo ya Amali:

108. MHESHIMIWA SULEIMAN SARAHAN SAID (Jimbo la Chake Chake) - Atamuuliza Mheshimiwa Waziri wa Elimu na Mafunzo ya Amali:

Katika mji wa Chake Chake ipo skuli ya Madungu Sekondari ambayo ni ya kisasa na takriban Wilaya zote za Zanzibar zimejengwa skuli hizo ili kukuza elimu. Skuli ya Madungu Sekondari ina takriban miaka miwili tokea ianze kufanya kazi lakini sasa hivi imekaa kama gofu, inavuja na dari "Ceiling" zake zote zimeharibika na ikinyesha mvua, maji yote yamo ndani mpaka wanafunzi wanashindwa kusoma wakati wa mvua.

- (a) Je, Serikali inalifahamu suala hilo na imechukua hatua gani kwa mkandarasi aliyejenga skuli hiyo.
- (b) Je, Mkandarasi aliyejenga skuli ya Madungu Sekondari ndie aliyejenga skuli zote za Zanzibar za aina hiyo.
- (c) Je, wakati wa ujenzi wa skuli ya Madugu Sekondari ilikuwa na msimamizi wa Wizara ya Elimu au wa Serikali.

Wizara ya Kilimo, Maliasili, Mifugo na Uvuvi:

69. MHESHIMIWA OMAR SEIF ABEID (Jimbo la Konde) - Atamuuliza Mheshimiwa Waziri wa Kilimo, Maliasili, Mifugo na Uvuvi:

Kwa kuwa hivi karibuni Wizara ya Kilimo ilifanya maonesho makubwa pale Kizimbani/Dole, na kwa sababu ni nzuri kwani wananchi wetu walipata fursa ya kujionea mazao mbali mbali yanayozalishwa hapa Zanzibar ambapo pia wakulima wetu wameweza kujifunza mengi kupitia maonesho hayo. Vile vile, JKU nao walionesha bidhaa zao ambazo wamelima na wanaushirikiano na Misri.

- (a) Je, Wizara ya Kilimo Zanzibar ina mpango gani wa kupeleka wataalamu wetu nchini Misri kwenda kuongeza utaalamu wa kilimo cha umwagiliaji, hasa kwa kilimo cha mboga mboga ili tuweze kuongeza uzalishaji kwa wakulima wetu.
- (b) Je, kuna utaratibu gani wa kuwapatia wakulima wetu zile mbegu bora kutoka Misri hasa za nyanya, vitunguu, pilipili boga n.k ambazo zilioneshwa kwenye banda la JKU.
- (c) Je, ni lini Wizara imefikiria utaratibu wa kuanzisha maonesho mazuri ya kilimo kama yale yatafanywa pia kwa upande wa Pemba.

73. MHESHIMIWA OMAR SEIF ABEID (Jimbo la Konde) - Atamuuliza Mheshimiwa Waziri wa Kilimo, Maliasili, Mifugo na Uvuvi:

Kwa kuwa msimu wa kuatika miche kwa ajili ya matayarisho ya upandaji miti kwa kipindi cha masika kitachoanza mwezi wa march 2018 unakaribia. Na kwa kuwa sababu miche ya aina tofauti hupatikana kwenye vitalu vya Serikali pamoja na miche ya mikarafuu ambayo wananchi wengi wamehamasika kuipanda kwa wingi sana.

Je, kuna mpango gani kwa Wizara kuongeza vitendea kazi kama vile "Rainboot", "wheelbarrow" na keni za kumwagilia maji sambamba na kuongeza wafanyakazi ambapo inaonekana kuna upungufu mkubwa katika vitalu vya Serikali.

Wizara ya Ardhi, Maji, Nishati na Mazingira:

62. MHESHIMIWA OMAR SEIF ABEID (Jimbo la Konde) - Atamuuliza Mheshimiwa Waziri wa Ardhi, Maji, Nishati na Mazingira:

Serikali ina mpango wa kupeleka umeme Kisiwa cha Kokota kutokea Fundo na Uvinje. Na kwa sababu wakaazi wa Kisiwa cha Kokota wanaenda zaidi kupata huduma zao nyingi eneo la Kivumoni ambapo kuna vijiji havijapata kufikishiwa huduma ya umeme navyo ni Mtekofi, Mtemani, Kipangani, Migombani na Utaani ambapo kuna zaidi ya nyumba zao za Makaazi. Na kwa sababu “Transformer” iliyofungwa Fundo Mabaoni inauwezo wa kutosheleza matumizi kwa ajili ya Mabaoni na Uvinje.

- (a) Je, Serikali haioni kwamba kupeleka umeme Kisiwa cha Kokota kupitia Kivumoni kutapunguza gharama za mara ya pili ya ujenzi wa laini kubwa nyengine kwa ajili ya vijiji vya Kivumoni na pia kutasaidia kupeleka huduma hiyo kwa wakaazi wa Kisiwa cha Funzi ambacho kipo karibu na Kisiwa cha Kokota.
- (b) Je, ni lini kazi za awali za upelekaji wa umeme kisiwani humo zinatarajiwa kuanza.

63. MHESHIMIWA OMAR SEIF ABEID (Jimbo la Konde) - Atamuuliza Mheshimiwa Waziri wa Ardhi, Maji, Nishati na Mazingira:

Kwa kuwa Idara ya Utawala wa Ardhi ina jukumu kubwa la kusimamia maswala yote yanayohusiana na ardhi (Security of Land Tenure). Na kwa sababu kitengo hiki ni muhimu kwa ajili ya kutunza kumbukumbu pamoja na utayarishwaji wa ramani. Pamoja na kazi zote muhimu, Idara hii inakabiliwa na changamoto za ukosefu wa vitendea kazi kama vile kompyuta za kuingizia taarifa ambazo zimeshachoka sana na “printer” kubwa kwa ajili ya kutolea ramani na kutayarisha hati mbali mbali zinazohusiana na umiliki wa ardhi n.k.

- (a) Je, ni kwa sababu gani Idara muhimu kama hii kutopatiwa au kubadilishiwa kompyuta na “printer” nyengine kila mara, pale ambapo itabainika kwamba

kompyuta hizo au “printer” zimeshachoka ili kuleta ufanisi wa kazi katika Idara hiyo.

- (b) Je, kuna mpango gani kwa Wizara kuipatia Idara ya Upimaji kwa upande wa Pemba vifaa vipya kwa ajili ya shughuli za upimaji ukitilia maanani kwamba vifaa vilivyopo ni vya zamani toka miaka ya 1990.
- (c) Je, Wizara ina mpango gani wa kutatua tatizo la usafiri kwa kuwapatia gari Kamisheni ya Ardhi ambayo wana gari 1 “Land Cruiser” ya tokea mwaka 1993 na “Double Cabin” ambayo limeshachoka sana.

Wizara ya Biashara, Viwanda na Masoko:

83. MHESHIMIWA ALI KHAMIS BAKARI (Jimbo la Tumbe) - Atamuuliza Mheshimiwa Waziri wa Biashara, Viwanda na Masoko:

Rais wa Jamhuri ya Muungano wa Tanzania na Rais wa Zanzibar na Mwenyekiti wa Baraza la Mapinduzi wanastahili pongezi kwa kuiongoza nchi na kuwaletea maendeleo endelevu kwa jamii hususan katika uimarishaji wa viwanda. Ikiwa kaulimbiu ya mwaka huu “Shiriki kupambana huu si wakati wa maneno ni wakati wa vitendo”. Katika hotuba ya Rais Magufuli siku ya maadhimisho ya Mwenge wa Uhuru alisema kumeongezeka viwanda vipya 3308 katika mwaka 2017.

- (a) Je, ongezeko hilo la viwanda vipya Zanzibar tumepata vingapi ikiwa ni sehemu ya Jamhuri ya Muungano.
- (b) Je, Serikali ina mkakati gani kuona inapambana juu ya jambo hili ili kutoa fursa za ajira kwa vijana.

Wizara ya Habari, Utalii, Utamaduni na Michezo:

84. MHESHIMIWA ALI KHAMIS BAKARI (Jimbo la Tumbe) - Atamuuliza Mheshimiwa Waziri wa Habari, Utalii, Utamaduni na Michezo:

Katika hotuba yake Rais wa Jamhuri ya Muungano wa Tanzania Mhe. Dkt. John Pombe Magufuli wakati wa kilele cha Mwenge wa Uhuru katika Kiwanja cha Amani,

alimpongeza Rais wa Zanzibar na Mwenyekiti wa Baraza la Mapinduzi Mhe.Dkt. Shein kwa kuwepo idadi kubwa ya uingiaji watalii hapa Zanzibar na pongezi hizi zimekuja kutokana na kuwa Zanzibar ndio inayo vivutio vingi na fukwe zake ni nzuri.

- (a) Je, ni watalii wangapi wameingia katika kipindi hiki cha miezi sita (6) hadi hivi sasa.
- (b) Je ni kiasi gani cha fedha zilizopatikana kwa kipindi hicho.

Wizara ya Afya:

- 101. MHESHIMIWA SULEIMAN SARAHAN SAID (Jimbo la Chake Chake) - Atamuuliza Mheshimiwa Waziri wa Afya:

Naipongeza Serikali ya Mapinduzi ya Zanzibar kwa kuendeleza na kujenga Hospitali mpya lakini katika mji wa Chake Chake, Hospitali ya Chake ipo mjini na eneo ni dogo na majengo yake yote ni ya kawaida lakini kuna fedha zimeshatengwa za kuyakarabati majengo.

- (a) Je, Serikali ina mpango gani wa kuijenga hospitali kuwa ya ghorofa ili kukidhi haja ya hospitali hiyo.
- (b) Je, Serikali haioni kuikarabati hospitali hiyo na baadae ije ivunjwe ili kuitanua kwa ghorofa ni bora ikafanya uamuzi wa busara kukusanya fedha za kuijenga kwa ghorofa kuliko hasara mara mbili.
- (c) Je, Serikali haioni umuhimu wa kulitumia eneo la hospitali hiyo vizuri ili likidhi haja ya kutumika kwa karne na karne.

Wizara ya Ujenzi, Mawasiliano na Usafirishaji:

- 27. MHESHIMIWA. MUSSA FOUM MUSSA (Jimbo la Kiwani) - Atamuuliza Mheshimiwa Waziri wa Ujenzi, Mawasiliano na Usafirishaji:

Katika malengo yake ya mwaka 2017/2018 Wizara ya Ujenzi, Mawasiliano na Usafirishaji ilipanga kuweka taa za kuongozea magari (Traffic Lights) katika maeneo ya makutano ya barabara ya Muzamil Center, Mtoni na kwa Jumapweza kwa Unguja, Mtemani na Chachani (PBZ Junction) kwa upande wa Pemba.

- Je, mpango huo umefikia wapi utekelezaji wake.
53. MHESHIMIWA OMAR SEIF ABEID (Jimbo la Konde)-
Atamuuliza Mheshimiwa Waziri wa Ujenzi, Mawasiliano na Usafirishaji:

Kwa kuwa Shirika la Bandari Zanzibar linamiliki Minara ya kuongozea Meli za Kimataifa, kama Kigomasha na Matumbini iliyopo Pemba na mnara wa Mwana wa Mwana Chumbe, Kizimkazi n.k iliyopo Unguja. Na kwa sababu Mamlaka ya Bandari Tanzania ndio inayolipwa fedha hizo na baadae kuzigawa kwa Shirika la Bandari Zanzibar.

- (a) Je, ni kiasi gani cha fedha ambacho kinastahiki kulipwa Shirika la Bandari Zanzibar kutoka Mamlaka ya Bandari Tanzania.
- (b) Je, ni muda gani ambao Shirika la Bandari Zanzibar halijapokea fedha kwa ajili ya malipo kwa matumizi ya minara hiyo kutoka Mamlaka ya Bandari "THA" Tanzania.

II. HOJA ZA SERIKALI:

Waziri wa Nchi, Ofisi ya Makamo wa Pili wa Rais:

Mswada wa Sheria ya Kufuta Sheria ya Uchaguzi Nam.11 ya 1984 na Kutunga Sheria ya Uchaguzi ya mwaka 2017 na Masuala Mengine Yanayohusiana Nayo.

Zanzibar,
13 Disemba, 2017.

(Raya Issa Msellem)
KATIBU WA BARAZA.